



Iesus apparut à ses Disciples entrant où ils estoient les portes fermées, & souffla sur eux leur baillant le saint Esprit.

VAND le premier iour apres le Sabbath fut venu, & comme les portes du lieu auquel les Disciples estoient assemblez pour la crainte des Iuifs, estoient fermées, ils parloient entr'eux, Iesus vint, & s'apparut aux onze, & se presenta au milieu d'eux, & leur dist, Paix soit avec vous : & estans troublez & estonnez, ils cuidoient que ce fust vn esprit : mais Iesus les asseurant leur dist, Pourquoi estes-vous ainsi émeus en vos cœurs ? touchez mes mains & mes pieds, car c'est moy-mesme : vn esprit n'a ny cher ny os, ainsi que vous me voyez auoir. Les Disciples doncques ayans veu le Seigneur se réjouirent : mais ils ne le croyoient point encore de ioye, & s'esmerueilloient : mais Iesus pour les asseurer leur dist, auez-vous quelque chose à manger ? & ils luy presenterent vne piece de poisson rosty, & du rayon de miel, & en mangea deuant eux, & leur reprocha leur incredulité & dureté de cœur, pource qu'ils n'auoient point creu à ceux qui l'auoient veu ressuscité. Iesus derechef leur dist, Paix vous soit, comme mon Pere m'a enuoyé, aussi ie vous enuoye. Quand il eut dit cela, il souffla sur eux & leur dist, Receuez le saint Esprit : à tous ceux à qui vous pardonneres les pechez, ils leur seront pardonnez ; à quiconque vous les retiendrez, ils leur seront retenus.